

花
當
閣
業
談

花當閣叢談卷一 目錄

官制

訛字

大臣久任

幅員

九邊

邊費

都察院

寶璽

印章

牙牌

四夷館

副副將軍

殉葬

鐵券

司牲所

乾明門

名言
卷一
內官

女職

宮變

搗鼓

鹽法

賦法

戶口

鈔關

衣制

先師廟

高墻

大禮議

南都宮殿門闕

御藥

貢魚

梳粧臺

郡縣同名

密揭

司禮監

搜廝

物價

冕旒

文武官品階勳祿

賜筵食品

久任

禁刑口

娼盜

衍聖公下程

酒樓

食鷺

西內老佛

北征詳節

金賓

南內

巡遊考詳節

田經歷

王知事

婁妃

姚布政
李劉相配

錢寧

江彬

張父冕

劉瑾

花當閣叢談卷一一名邨老委談

海上徐復祚陽初齋編述

邨老曰此二冊稍及朝典非無以也邨中時有酒社
每會諸社長輒有所徵引且多俚鄙不根之語余老
健忘不能一二記憶因取諸家叢說摘其有資於談
議者筆記之以備遺忘以省應對或謂以爲留心世
務則失之遠矣

官制

內閣九卿國初原無拘出身之例成弘間入閣必由翰

林吏部左右堂必用翰林一人禮部非翰林不用兵部正堂必由巡撫左右堂必南北各一人都察院正堂必由御史至世廟間局面稍變矣霍韜曰漢朝賢相俱由郡守宋制宰相亦須歷州郡欲其知閭閻困苦與練達人情也我朝若薛瑄則由御史李賢則由主事入閣皆爲一時名臣今楊一清亦由巡撫轉吏部入閣是誠立賢無方善能變通者也然世廟張夏諸公則又由大禮而入也按洪武中丞相胡惟庸誅後遂罷丞相不設而分任六卿嚴爲禁革內閣止置大學士以備顧問官僅

五品不預政柄而遷轉由於吏部互相鈐制其防甚密
自三楊入閣乃以少師尚書兼大學士官尊於六卿口
銜天憲無丞相之名而有丞相之實矣故中外皆稱爲
宰相云閣中有文淵閣印印文玉箸篆惟封上詔草題
奏揭帖用之不下諸司下諸司用翰林院印永宣以前
翰林不拘進士出身若方孝孺楊士奇胡儼輩俱非進
士至天順間用李賢議特重進士科而翰林非一甲及
庶吉士不得預矣然史館之中修撰編修檢討吉士俱
自稱爲太史氏特有史官名耳實錄進呈焚草液池一

字不傳况中間類多細事重大政體多不錄王鑒罪言
曰班固死天下不復有史矣古之所謂史官皆世守之
人主所在執筆以從隨其言動皆親見而直書之後世
雖具員而無專職立班雖近螭頭亦遠在殿下人主動
靜邈不相及政事不及與聞惟易世之後集前後奏疏
而分曹書之以宰臣爲總裁奏疏之語果皆實乎分曹
之人宰臣之意果皆公且正乎且生於數十年之後追
書數十年之前其是非曲直皆茫然無聞或得之傳聞
已非其實縱得其實而亦莫能燭其情僞或奪於衆不

得書或迫於勢不敢書或局於才不能書故一時君臣謀議勦業汨沒不傳而奸險情態亦無能發其微以爲世戒監領者又往往以私好惡雜乎其間故曰不復有史矣

訛字

內外章奏呈進發內官查對若檢出一訛字賞銀五錢其後張江陵柄政亦發中書查對檢出字訛者賞亦如之

大臣久任

塞義爲吏書夏原吉戶書皆二十七年黃福尚書兩京三十九年而在交南者十九年胡濱禮書三十二年周忱巡撫江南二十二年

幅員

按寰宇通志我朝幅員狹於漢廣於北宋而與唐等天下道里東距遼東都司又自遼東東北至三萬衛西極四川松潘衛又西南距雲南金齒南踰廣東崖州又東南至福建漳州府北暨北平太寧衛又西北至陝西甘肅縱一萬九百里橫一萬一千七百五十里

九邊

丸邊初設遼東宣府大同延綏復設寧夏甘肅薊州皆文武大臣鎮守提督又以山西鎮巡按偏頭三關陝西鎮巡按固原共爲九鎮弘治間設總制於固原嘉靖間設專督於三關權任差異而邊防則一

邊費

宣府歲用銀九十二萬五千九百餘兩大同歲用銀九十九萬三千四百六十餘兩遼東歲用銀三十九萬四千八百七十餘兩延綏歲用糧料五十二萬一千三十

六石零寧夏歲用糧料五十三萬四千二百五石草三百九十三萬九千六百餘束甘肅歲用糧料六十九萬七千六百石零草五百二十萬三千八百五十四束大約歲費四百餘萬而隨時用兵不與焉

都老曰本朝防邊如此與漢唐驅出境外者絕不同
都察院

唐御史大夫卽今左右都御史中丞卽今左右僉都御史唐有三院曰臺院曰殿院曰察院今惟稱察院祖宗設都御史六員六部之職各有攸司而都察院惟所見

聞不繫職司皆得糾察其屬十三道監察御史盡然十
三道各分掌其布政司事而兩京則南隸貴州北隸雲
南御史之職在糾劾百司照刷文卷問擬刑名巡按郡
縣朝廷耳目之任也漕運之有都御史自王竑始兩
廣之有總督文臣自王翹始鄖陽之有撫治自原傑始
江南之有巡撫自周忱始汀漳撫臣之提督軍務自王
守仁始陝西之有鎮守都御史自陳鑑始巡撫侍郎之
兼都御史自耿九疇始

寶壘

寶璽十有四曰奉天之寶鎮萬國祀天地用之曰皇帝
之寶冊封賜勞用之曰皇帝信寶徵召軍旅用之曰天
子之寶祭享鬼神用之曰天子行寶封賜蠻夷用之曰
天子寶調發番兵用之曰制誥之寶誥命用之曰敕命
之寶敕命用之曰廣運之寶黃選勘籍用之曰御前之
寶進御座從車駕用之曰皇帝尊親之寶答賜宗人用
之曰敬天勤民之寶訓迪有司用之凡用寶捧寶收寶
洗寶尚寶司官與印綬監內官俱

印章

諸司印九疊篆御史印八疊文淵閣印玉箸文將軍掛
印柳葉文

牙牌

在內文武朝臣各懸牙牌其號五曰勳曰親曰文曰武
曰樂以察朝參若僕人或僕於人均坐罪

四夷館

館凡八曰韃靼曰女直曰西番曰西天曰回回曰百夷
曰高昌曰緬甸以翰林一人掌之曰提督四夷館少卿

副副將軍

人知有副將軍不知有副副將軍洪武初以信國公達爲征虜大將軍文忠勝爲左右副將軍愈和左右副副將軍北伐是也後以參將代副副將軍

殉葬

洪武三十一年七月太祖崩於西宮宮人殉葬者若干人張鳳李衡趙福張弼汪濱孫瑞王斌楊忠林良李成張敏劉政皆殉葬宮人之家以爲錦衣衛千百戶等官有差世世承襲

鐵券

鐵券高廣有差等凡七等公二等侯三等伯二等其制
如瓦外刻歷履恩數之詳以紀其功中鏞免罪減鑑之
數以防其過每副剖而爲二分爲左右左頒諸功臣右
藏內府有故則合之以取信

司牲所

所中養羊三百六十餘隻每隻日飼黑豆八合草一斤
牧羊軍一百二十名官吏二名

乾明門

乾明門養猫十二隻日飼猪肉四斤七兩肝一副刺蝟

五個日飼豬肉十兩羊二百四十七隻日支菜豆二石
四斗三升黃豆三升二合西華門狗五十三隻御馬監
狗二百二十二隻日共支猪肉并皮骨五十四斤虎三
隻日支羊肉十八斤狐狸三隻日支羊肉十四斤西華
門扣處鵝子房日支菜豆粟穀等項料食十石一日所
用如此若以一年計之共用猪羊肉并皮骨三萬五千
九百餘斤肝三百六十副菜豆粟穀等項四千四百八
十餘石此弘治初年事正德中不知增幾倍嘉靖初量
減西苑豹房蓄文豹一隻役勇士二百四十人歲廩二

千八百餘石又佔地十頃歲租七百金此皆供內臣侵牟影射之資又內馬監蓄馬甚多馬料甚豐其弊尤甚每至有餓死者

鄭老曰此見湧幢小品中然余在京師常從張少齋內相謁飲間談及其言正不止此卽鳥房所支每年豆粟六萬石文豹久無有不知二百四十勇士亦設否然郡中一機戶名彭禹其子日買熟豕蹄飼獅貓又某子甲以人參煮秫米粥飼馬又何怪乎國家之虛費也

內官

內官凡五等曰監曰門曰司曰局曰庫分掌掖庭之事
凡監十一曰神宮監掌灑掃曰尚寶監掌玉寶敕符
將軍印信曰陵神宮監掌灑掃并栽種等事曰尚膳監
掌供養及玉膳并宮內食用之物及催督光祿寺造辦
宮內筵宴茶飯曰尚衣監掌御用冠冕袍服履舄鞶鞬
等曰司設監掌御用車輦牀被褥帳幔曰內官監掌成
造婚禮妝奩冠烏織扇被褥帳幔儀仗并內官內使帖
黃一應造作宮內器用首飾食米土庫架閣文書鹽倉

冰窖曰司禮監掌冠婚喪祭一廳禮儀制帛及御前勘合賞賜筆墨裱褙稍書畫管長隨當差內使人等出門馬牌等事曰御馬監掌御馬并各處進貢及典牧所關收馬驥曰印綬監掌誥券帖黃印信選簿圖畫勘合符驗曰直殿監掌灑掃殿庭樓閣廊廡每監各有太監少監左右監丞典簿長隨奉御等名品自正四遞減至正六凡門四奉天門午門端門承天門掌晨昏啟閉關防出入各有門正門副正從四品 凡司二曰鐘鼓司掌奉先殿祭樂御樂并宮內筵宴樂更漏早朝鼓曰惜薪

司掌宮內柴炭各有司正司副正從五品 凡局六曰
兵仗局掌御用兵器并造刀甲等及宮內所用梳篦剔
牙針翦等曰內織染局掌染造上用并宮內一應段匹
曰針工局掌成造一應婚禮衣服并內官衣服曰巾帽
局掌內官紗帽鞚鞬及賞賜巾帽等曰司苑局掌宮內
菜蔬并種田田酒醋麵局掌宮內食用酒醋麵糖等各
有大副使正從五品 凡庫三曰內承運庫掌段匹金
銀珠玉象牙等物并同司鑰庫管鈔曰司鑰庫掌內各
衙內鎖鑰并收藏鈔曰內府供應庫掌上用香米并內

用香燭油米及內官飯食果木等各有大副使正從五品
東宮典璽局掌寶璽翰林等物典藥局掌監同御醫修合藥餌典膳局掌監造膳食典服局掌冠冕帽袞袍常服珮帶靴履等典丘局掌甲冑戈矛弓矢刀劍典乘局掌車馬各有局郎丞正從五品 又有都知監銀作局公王府中使司司正司副雜職

鄭老曰按成周之制以冢宰統閭寺西漢之制以丞相監宮中宋人循周漢之遺亦以宦家屬宰相樞密故內侍任守忠有罪韓魏公得以檄召而議貶近習

梁彥俊言僕射葉顥得以逮至政事堂而叱責之他可知矣三代而下制置閹宦之法莫良於宋故終宋之世宦官雖專政亂國之禍視漢唐大不侔矣

女職

洪武五年定六局一司局曰尚宮尚儀尚服尚食尚寢尚功司曰宮正俱正六品尚宮總司紀司言司簿司閨尚儀總司籍司樂司賓司贊尚服總司冠司衣司仗司飭尚食總司饌司醞司藥司供尚寢總司設司輿司苑司燈尚功總司製司珍司采司計凡二十四司官正掌

戒令責罰之事

宮變

世皇二十一年冬十月上幸曹妃宮妃寢官婢楊金英等共謀行弑俟上寢熟以組縊之而誤爲死結謀得不遂監宮張金蓮知狀亟走白后后曳裾馳至爲解項組上得蘇病不能語后命收金英等十餘人併曹妃磔於市時事起倉卒妃實不知上深憫其冤族金英等家

鍋鼓

禁鼓一千二百三十聲爲一通三千六百九十九聲爲三

通在外更鼓三百三十撾爲一通干撾爲三通

鹽法

天下名鹽運兩淮課居其半而浙次之長蘆又次之兩淮課幾二百萬可當漕運米直全數福場無巡御以行無遠地河東場無運官以出有專所廣場兼之故巡運俱無清理鹽法都臺止一員統治長蘆淮浙

賦法

蘇州府一州七縣額田九萬頃歲徵糧二百七十萬帶耗共稅糧三百五十萬淮安府兩州九縣額田十八萬

印歲征糧三十六萬較農田之廣狹淮安加蘇州一倍
歲糧之徵輸蘇州加淮安十倍又松江惟三縣歲輸稅
糧一百二十萬餘北直隸八府一十八州一百一十七

縣歲輸稅糧亦一百二十萬以松江三縣當一百三十
五州縣輕重懸絕如此蘇松之民何辜而獨受其困哉

戶口

淮以北土無定畝以一望爲頃故每多欺隱田糧江以
南戶無實丁以系產爲戶故多脫漏戶丁洪武初年甫
脫戰爭人民凋殘戶一千六百五萬有奇口六千五十

四萬有奇宏治時承平日久戶口宜蕃息乃戶減國初一百五十四萬口減七百一十一萬此其故何也周忱戶口論曰或投倚於勢豪之門或招誘於僧道之途冒名爲匠則在南京者應天府不知其名在北京者順天府罔稽其籍絜家於舟則四水汪洋莫可踪跡戶口日耗職此由也

鈔闕

鈔闕臨清河西務滸墅九江淮安揚州杭州金沙州內惟河西務杭州金沙州稅貨餘止稅船料河西務入京

門戶杭州出閩廣總道金沙州出雲貴總道雲貴貨簡
故金沙州近無部差惟臨清稅貨亦稅船

衣制

高皇見朝臣衣服多取便易乃定衣制凡官員衣服寬
窄隨身文官自領至裔去地一寸袖長至手復回至肘
袖椿廣一尺袖口九寸公侯駙馬與文職同耆民生員
亦同惟袖過手復回不及肘二寸庶民衣長去地五寸
武職官去地五寸袖長過手七寸袖椿廣一尺袖口僅
出拳軍人去地七寸袖長手五寸袖椿七寸袖口僅出

奉領示天下乃今婦人之衣如文官去地寸許裙與衣等而男子之制迥殊古昔袖之廣幾於全疋帛男女盡然殊不耐觀

先師廟

孔廟自洪武至正德末稱大成至聖文宣王嘉靖九年始改爲至聖先師孔子四配爲復聖顏子宗聖曾子述聖子思亞聖孟子從祀及門弟子稱先賢改大成殿爲先師廟大成門爲廟門

高牆

鳳陽有高牆宗室有罪者悉安置其中建庶人建文君之次子也英宗復位因恩建庶人輩無寧淹禁謂李賢曰親親之義實所不忍實對曰陛下此一念天地鬼神實臨之太祖在天之靈寶臨之堯舜存心不過如此左右皆以爲不可上曰有天命者任自爲之遂遣居鳳陽令有司造房屋給薪米器用聽其婚嫁出入然庶人雖出轄驛不能名六畜未幾卒自是懿文太子及建文君皆絕

大誥

今罪人爰書照出內有大誥減等一欵云高皇帝製
大誥三篇序末云一切官民諸色人戶有此一本若犯
笞杖徒流罪者每減一等無者每加一等然至於今但
有減等而無加等

大禮議

嘉靖入繼大統閣學楊廷和禮書毛澄會同府部翰林
科道上議宜如宋英宗漢安懿王故事稱孝宗爲皇考
改稱興獻王爲皇叔父興獻王妃爲皇叔母大理寺辨
事進士張璁後改名孚敬上疏其略曰朝議尊聖考爲皇叔

父聖母爲皇叔母不過拘執漢定陶王宋濮王故事耳
言者謂孝宗德澤在人不可無後夫孝宗誠不可忘使
聖考尚存嗣位今日恐弟亦無後兄之義今聖考往矣
稱以皇叔父幽冥之中固不得而知但迎養聖母稱以
皇叔母則當以君臣禮見恐子無臣母之義故謂繼統
武宗而尊崇其親則可謂繼嗣孝宗以自絕其親則不
可夫統與嗣不同而非必父死而子立也後反覆辨論
不下數十次卒從璁議尊聖考爲獻皇帝然遜不敢祔
宗廟別爲世廟祀禮如宗廟旣尊稱睿宗始祔太廟享

卷之三
祫如列聖而撤世廟之禮

南都宮殿門闕

闕門曰午門翼以樓觀中三門東西爲左右掖門午門內曰奉天門門之左右爲東西角門內正殿曰奉天殿受朝賀所也殿之左右有門左曰中左門右曰中右門兩廡之間左曰文樓右曰武樓奉天之後曰華蓋殿華蓋之後曰謹身殿殿後則後官之正門也奉天門外兩廡之間有門左曰左順門右曰右順門左順門之東爲東華門內有殿曰文華殿東宮視事之所也右順門之

西爲西華門內有殿曰武英殿齋戒時所居也北京官殿規制悉如南京而高敞壯麗過之復於皇城東南建皇太孫宮東安門外東南建十王邱通爲屋八千三百八十楹永樂十五年六月興工十八年九月成以前仍御舊宮建文時作省躬殿在乾清坤寧二宮門側爲退朝燕息之所

御藥

御藥烹二劑爲一服候熟分爲二器御藥先嘗次院判次內官其一器以進御聞死聖大故御醫擬罪未知然

否

貢魚

葛原六海門縣人魁梧豪俠以布衣詣闕下獻鯽魚百尾時國初法嚴衆爲危之則笑曰爾不上食父母耶君猶親也庸何傷及至高皇帝大悅問之曰魚美何如蒲伏前頓首對曰魚美但臣未進不敢嘗耳又大悅命大臣賜酒食仍選一尾還之曰勞汝勞汝其後歲貢魚十九尾著爲令

梳妝臺

梳妝臺者相傳起於遼之蕭后考之遼史望氣者言女
直有天子氣甚旺遣使跡所自起乃一小石山玲瓏奇
其時女直方臣於遼多所需索因請此山自行輦取
女直許之乃大發人夫鑿而載之鑿之夜山鳥皆悲鳴
卽以其石築臺此臺與山之所自起也

郡縣同名

今天下府以太平名者二南直隸廣西州以通名者二順天

真定府以趙名者二大理府縣以太平名者三寧國府平陽府

以定遠名者三鳳陽府楚雄府以永寧名者三隆慶州河

南府吉安府

府以新城市名者四保定府濟南府杭州府建昌府其他二名相同者不

可枚舉只以陝西一省而言徽州寧州蘭州咸寧山陽華亭安化石泉之名皆與他處相犯至於安定不但瓊州有此縣名而本省鞏昌延安兩府亦並有之稱謂相及殊不便

密揭

閣中凡有密奏及奉諭登答者皆稱爲揭帖其規制視諸司題式差狹而短字如指大以文淵閣印緘封進御左右近侍莫得窺也諸凡軍國要機朝廷大政上意之

所欲出而事理未安政體之所宜行而睿衷未發諸司待命而未報言官力諍而難回者閣臣爲之從中調劑就事匡維其妙用全在此揭

司禮監

國制司禮監九人其掌印者一如首揆歲納二十四監銀各三萬兩約有七十萬之數其八人則季輪二人管事凡內之傳宣外之奏請屬焉是君相之情所由灌輸也二人應直例於吏禮戶兵四部居間二事事約千金宰相以此餌之實借以通官府消息故有所執奏陳請

旨意

搜廊

朝制每日申刻則內使二人錦衣二人各執黃旗巡穿內庭名曰搜廊

物價

洪武中禮部欽奉聖旨今後但係光祿寺買辦一應供用物件比民間交易價錢每多十文且如肉骨之類民人交易一百文一斤光祿寺買須要一百十文隨物貴賤每加十文賣物之人照依時價取十文利息時膳羞

甚約親王妃旣日支羊肉一斤牛肉卽免或免支牛乳
御膳亦甚儉唯奉先殿日進二膳

冕旒

古冕十二旒旒十二玉前後各用玉百四十四宋時
冕中貴人呼爲平天冠共用北珠一百四十五顆麻珠
四千五百九十顆調珠八千六百四顆則冕可謂至重
今制凡祭天地宗廟則服衮冕社稷等則服通天冠絳

袍

文武官品階勳祿

品秩崇卑勲階陞轉俸祿損益歷年滋久屢有不同無以示成憲于後世乃命儒臣重定其品階勲祿之制以示天下惟醫學陰陽僧道官俱不給祿

太師太傅太保少師少傅少保宗人令左右宗正左右宗人左右都督印正一階初授特進榮祿大夫陞授特進光祿大夫勲左柱國右柱國祿月支米八十七石太子太師太子太傅太子太保都督同知品從一階初授榮祿大夫陞授光祿大夫勲柱國祿月支米七十四

石太子少師太子少傅太子少保尚書左右都御史
品正二階初授資善大夫陞授資政大夫加授資政大
夫勲正治上卿 都督僉事正留守都指揮使品正二
階初授驃騎將軍陞授金吾將軍加授龍虎將軍騎上
護軍祿以上文武俱月支米六十二石 衍聖公真人
俱品正二無勲祿 左右布政使品從二階初授中奉
大夫陞授通奉大夫加授正奉大夫勲正治卿 都指
揮同知品從二階初授鎮國將軍加授奉國將軍陞授
定國將軍勲護軍祿以上文武俱月支米四十八石

太子賓客侍郎副都御史通政使大理卿太常卿詹事
府尹按察使品正三階初授嘉議大夫陞授通議大夫
加授正議大夫勲資治尹 副留守都指揮僉事指揮
使品正三階初授昭勇將軍陞授昭毅將軍加授昭武
將軍勲上輕車都尉祿以上文武俱月支米三千五石
光祿卿太僕卿行太僕卿苑馬卿參政都轉運鹽使
品從三階初授亞中大夫陞授中大夫加授大中大夫
勲資治少尹 留守指揮同知衛指揮同知宣慰使品
從二階初授懷遠將軍陞授定遠將軍加授安遠將軍

動輕騎都尉祿以上支武俱月支米二十六石宣慰使
係土官無祿餘倣此 勅都御史通政大理太常太僕
少卿少詹事鴻臚卿京府丞按察副使行太僕少卿苑
馬少卿知府品正四階初授中順大夫陞授中憲大夫
加授中議大夫勲贊治尹 指揮僉事宣慰同知品正
四階初授明威將軍陞授宣威將軍加授廣威將軍勲
上騎都尉祿以上文武俱月支米二十四石 國子監
祭酒布政司參議鹽運同知品從四階初授朝列大夫
陞授朝議大夫加授朝請大夫勲贊治少尹祿月支米

二十石 宣慰司副使宣撫司宣撫品從四階初授宣
武將軍陞授顯武將軍加授信武將軍勳祿無 殿大
學士閣坊大學士翰林學士庶子通政司參議大理寺
丞尚寶卿光祿少卿部郎中欽天監正太醫院使京府
治中宗人府經歷上林苑監正按察僉事府同知王府
長史品正五階初授奉議大夫陞授奉政大夫勳修正
庶尹 儀衛正正千戶宣慰同知品正五階初授武德
將軍陞授武節將軍勳驍騎尉祿以上文武俱月支米
十六石 侍讀學士侍講學士諭德洗馬尚寶鴻臚少

卿員外郎五府經歷知州鹽運副使鹽課提舉品從五
階初授奉訓大夫陞授奉直大夫勲協正庶尹 衛鎮

撫副千戶儀衛副招討司切招討宣撫司副使安撫司安
撫品從五階初授武略將軍陞授武毅將軍勲乘騎尉
祿以上文武俱月支米一斗四石 大理寺正詹事丞
中允侍讀侍講司業太常寺丞尚寶司丞太僕寺行太
僕寺丞主事太醫院判都察院經歷京知縣府通判上
林院監副欽天監副五官正兵馬指揮留守司都司經
歷斷事典仗審理正品正六階初授承直郎陞授承德

郎勲無百戶長官副招討宣撫僉事安撫同知品正
大階初授昭信校尉陞授承信校尉勳雲騎尉祿以上
文武俱月支米十石 神樂觀提點僧善世正一品正
大無勳祿贊善司直郎修撰光祿寺丞署正鴻臚寺
丞大理寺副京府推官布政司經歷理問鹽運判官州
同知鹽課司提舉市舶河渠副提舉品從六階儒初授
承務郎陞授儒林郎吏出身宣德郎勲無祿月支米八
石 都給事中監察御史編修評事行人司正五府都
察院都事通政司經歷太常博士典簿兵馬副指揮營

籍所正京縣丞府推官知縣按察司經歷留守司都司
都事副斷事審理副安撫僉事蠻夷長官品正七階儒
初授承事郎陞授文林郎吏出身宣義郎歎無祿月支
米七石五斗 檢討左右給事中給事中中書舍人行
入司副光祿典簿署丞詹事太僕主簿京府經歷靈臺
郎祠祭署奉祀州判官布政司都事副理問鹽課司副
提舉衛驛運司宣慰招討司經歷蠻夷副長官品從七
階初授從仕郎陞授徵仕郎祿月支米七石 國子監
丞五經博士行人部照磨通政司知事京縣主簿欽天

監主簿保章正御醫協律郎典牧所提領營繕所副大
通關寶鈔龍江司提舉衛知事宣慰都事府經歷縣丞
鹽同提舉按察知事王府典寶奉祀良醫典膳正紀善
講經至靈元符崇真宮靈官品正八階初授迪功郎陞
授修職郎祿月支米六石六斗 清紀郎翰林典籍國
子助教典簿博士光祿錄事監事鴻臚寺主簿京府運
司知事挈亞正祠祭署祀丞布政司照磨王府典膳副
奉祀副典寶副良醫副宣慰經歷神樂知觀崇真宮副
靈官左右覺義元義品從八階初授迪功佐郎陞授修

職佐郎祿月支米六石 校書侍書國子學正部檢校
鴻臚署丞五官監候司歷營膳所丞典牧所會同館文
思院承運寶鈔廣運廣積賦罰十字庫顏料皮作鞍轡
寶源等局織染所京府織染局各大使龍江寶鈔副提
舉府知事縣主簿長史司主簿典儀正典樂牧監正茶
馬大使贊禮郎奉鑾宣撫安撫司知事品正九階初授
將仕郎陞授登仕郎祿月支米五石五斗 待詔司諫
通事舍人正字詹事府錄事司務學錄典籍鳴贊序班
司晨漏刻博士司牧大使牧監副園長太醫院提舉司

鹽課司州所吏目軍儲御馬都督府門倉軍器等局大使承運寶鈔廣運廣積賊罰十字庫副使典牧所會同館文思院副使廣盈太倉銀太僕寺京府庫都稅宣課柴炭司大使顏料皮作鞍轡寶源局織染所京府織染副使草場大使孔顏孟子孫教授按察司檢校府宣撫司照磨典儀府副教授伴讀都司運司府京衛宣撫司學教授司庫司府雜造織染局稅課司大使司獄巡檢茶馬副使正術正科都綱都紀太常司樂教坊司韶舞司樂品從九階初授將仕佐郎陞授登仕佐郎祿月

支米五石 孔目掌餉學正教諭訓導兵馬斷事長官
司吏目司牲司牧副使府檢校典史軍器局柴炭司副
使遞運所大使驛丞河泊所閘壩官關大使牧監錄事
郡長提控案牘都督府御馬軍儲門倉副使廣盈庫都
課都稅稅課司副使茶鹽課司司府州縣衛所倉場大
使副鹽運司府衛提舉司所州縣庫大使副使司府州
軍器織染雜造局副使茶運批驗所巾帽針工局慶遠
裕民司竹副使司庫副使宣德倉司竹鐵冶河州遼陽
青州府樂安稅課司大使鹽倉稅課鈔紙印鈔鑄印抽

分竹木惠民局水銀硃砂場局生藥庫長史司倉庫大使副使縣雜造局副使典科訓科典術訓術副都綱都紀僧正道正僧會道會以上俱未入品階祿月支米三石

郵老曰我朝祿數薄甚矣然尚有折銀折綱折銀每石七錢折綱則二十兩不能一兩於是仰事俯育且不足不得不假借於皂隸銀矣正統以前每兼一官則支一俸以後雖兼一官三四止從高等或以勢績助歛加秋則爲特恩

賜筵食品

賜筵食品有寶粧茶食饗糖纏大銀錠小銀錠大饅頭小饅頭內湯粉湯像生小花果子油酥花頭鴛鴦飯馬牛猪羊內飯棒子骨羊背皮黑白餅甘露餅大油餅小點心鳳雞鳳鳴燒燂按酒果菜魚鮓燂魚雪子麻葉笑虧果糕軟按酒等

久任

漢之守令多久任者至長子長孫或十餘年或二十餘年我朝永樂宣德正統間法令近古其最久者若陝西鳳翔府知府扈遲至三十年寧州知州劉綱至三十二

年然後去故是時官無苟且之政民鮮送故迎新之費
吏絕因緣盜匿之弊上安下恬太平之極扈真定元氏
人劉河南鈞州人廉平之政人到於今稱之

禁刑日

月一日八日十四日十五日十八日二十三日二十四
日二十八日二十九日三十日釋氏謂之十齋日唐武
德二年詔自今以後每年正月五月九月及每月十齋
日並不得行刑永爲常式大明律云若立春以後秋分
以前決死刑者杖八十其犯十惡之罪應死及強盜者

雖決不待時若於禁刑日而決者笞四十禁刑日卽前十齋日也

娼盜

律云凡盜賊曾經刺字者俱發原籍收充警跡警跡者令其人戴狗皮帽每月朔望赴所司查點仍夜夜地方火夫逐更詰察在否其門立小綿楔高三尺許署曰盜盜之家令出入匍匐於中凡遇儒學行鄉飲酒禮時令其長跪階下宴畢方放回別懸之典可謂嚴矣又國初之制伶人常戴綠頭巾腰繫紅裙膊足穿布毛猪皮靴

不書
卷一
不容街中走止於道旁左右行樂婦布皂冠不許金銀首飾身穿皂背子不許錦繡衣服亦所以抑淫賤也今不知此制矣

衍聖公下程

衍聖公入京下程自宣德後用羊一隻鵝二隻酒六盞麵三十斤茶鹽醬各二斤油燭十枝其初欽賜後改禮部又改順天府今仍之

酒樓

樓作於洪武二十七年在江東諸門之外今民設酒肆

其間以接四方賓旅其樓有鶴鳴謳歌鼓腹來賓重譯等名

食鷺

食品以鷺爲重故祖制御史不許食鷺今則視爲常味日進數頭矣唐制御史不許食肉

西內老佛

老佛卽建文皇帝也正統五年十二月思恩州知州李瑛遇一老僧不避道從者呵之曰我建文皇帝也金川失守大內火起吾遂潛由地道以出雲遊四方以度歲

月胡濶名訪張邈遏戛爲我願送我骸骨歸瑛大駭聞
於巡按御史奏之乘傳到京有司皆以王禮見及至京
號爲老佛然尚未辨真僞以尚膳太監吳亮建文時內
使也使之審視之老佛見亮卽呼其名亮曰不是曰我
昔御便殿時棄片肉於地汝伏地飪食之何謂不是聞
楊士奇尚在能出一認乎亮佯爲不知已而復命遂居
老佛於西內以壽終葬西山不封不樹途次賦詩云渝
落江湖四十秋歸來白髮已蒙頭乾坤有主家何在江
漢無情水自流長樂宮中雲氣散朝元閣上雨聲愁新

蒲細柳年年綠野老吞聲哭未休

北征詳節

正統十四年己巳七月北虜也先大舉入寇大同兵失利城堡多陷警報時至太監王振勸駕親征百官伏闕懇留不聽十七日丙戌駕發京師命郕王居守英國公張輔成國公朱勇率官軍及私屬共五十餘萬出居庸關過懷來至宣府連日風雨聲息愈急并源宋瑛等敗報踵至羣臣請駐蹕振怒悉令掠陣未至大同兵士已乏糧僵屍滿路寇佯避誘我深入至大同振又欲進兵

朱勇勝行聽命戶丘書王佐鄺埜守老營先行矯旨罰
跪至暮而仆欽天監正彭德清以天文止行振不聽學
士曹鼐曰臣子不足惜主上繫天下安危豈可輕進振
怒嘗之曰倘有此亦天命也會暮有黑雲如繖罩御營
雷雨大作人畜驚懼振惡之而前軍西寧侯宋瑛武進
伯朱冕全軍覆沒鎮大同太監郭敬密言於振其勢決
不可行振始有回意議從紫荆關入振邀上過其蔚州
里第旣又恐損稼復轉從宣府行過鷄鳴山虜追至遺
朱勇率兵五萬禦之勇入鷄兒嶺虜分兩翼夾攻殺之

殆盡鄆摶請車駕疾驅入開嚴兵爲殿振怒曰豎儒安
知兵事次日駕至土木日尚未晡去懷來城二十里欲
入保懷來振輜重千餘輛在後未至留待之遂駐土木
虜四面合圍渴極掘井深二丈不得水虜分道入撓我
師不得行壬戌虜詐退振令移營虜驟逼之遂大潰上
蒙塵輜輶佐踵而下隨駕官數百員皆死焉馬驛二十
餘萬并衣甲器械輜重盡爲虜所得

全寅

寅山西安邑人少瞽學京房易占多奇中正統間客遊

大同上皇旣北狩陰遣使命鎮守太監裴當問寅寅筮得乾之初九附奏曰大吉可賀龍君象也四初之應也龍潛躍必以秋應以壬午浹歲而更龍變化之物也庚者更也庚午中秋車駕其還乎還則必幽勿用故也或躍應焉或之者疑之也後七八年必復辟午火德之王也丁者壬之合也其歲丁丑五月壬寅日壬午乎自今歲數更九躍則必飛九者乾之用也南面子衝午也其君位乎故曰大吉旣而上皇復辟年月日時無一謬云

南內

天順元年春正月景帝不豫時儲嗣未定內外憂懼石亨知帝病甚必不起乃與掌兵都督張輒張輓左都御史楊善副都御史徐有貞謀迎上皇復位遂結中官曹吉祥蔣冕白于皇太后許焉十六日旣暮輒輓等會于有貞宅時有邊報北虜欲寇京師有貞以爲宜乘此爲名納兵入內誰曰不可輒首肯之有貞復升屋覽步乾象亟下曰時在今夕不可有失將出有貞焚香祝天與家人訣曰事成社稷之福不成滅族之禍遂往會亨收掌門鑰開門納兵時已漏下四鼓天色晦冥亨輒等惶

感顧謂有貞曰事當濟否有貞大言曰時至矣勿退遂薄南宮城毀垣壞門而入亨等入見上皇出問曰爾等何爲俯伏合詞請陛下卽位遂共掖登輿有貞前導忽星月開朗上皇顧問卿等爲誰各以姓名對遂升奉天殿登御座初文武羣臣約是日入候景帝出視朝頃之南城呼譟震地羣臣失色須臾鐘鼓大鳴上皇復位矣羣臣遂入賀改景泰八年爲天順元年

巡遊考詳節

正德間邊將江彬許泰劉暉等皆有寵於上賜姓朱氏

號外四家與上在豹房同臥起狎近而彬尤寵每導上出宮遊戲近郭至十二年五月癸未上微行至石經山石經山寺宋寧所建也窮極壯麗邀上幸焉數日乃還八月甲辰朔上微服從德勝門出幸昌平外廷猶無知者辛未上度居庸關遂幸宣府令太監谷大用守關無縱出者江彬宣府人欲挾上自恣遂幸宣府營建鎮國府第時時夜出見高門大戶卽馳入或索其婦女於是富民賂彬以求免久之軍士樵蘇不繼燬民屋廬以供饗市肆蕭然白晝戶閉十二月內閣大臣及九卿至居

庸關講駕有禁不得出關而還閏十二月有旨戒諭京
城九門守門官勿放朝官出城丁亥立春迎春於宣府
備諸戲劇又飭大車數十輛令僧與婦女數百共載婦
女各執圓毬車旣馳交擊僧頭或相觸而墮上大笑以
爲樂十三年正月庚戌上復幸南海子辛亥還官以所
獵獐鹿賜羣臣辛酉復如宣府二月己卯太皇太后崩
越三日壬午上至自宣府乃發喪六月庚辰太皇太后
梓宮發引癸未至山陵遣駙馬都尉崔元等分告長獻
景裕茂泰諸陵上忽馳馬至山下陪祭官皆驚駭散上

飲於帳殿遂宿焉七月己亥傳旨近年以來邊患未寧

屢害地方且承平日久誠恐地方兵戎廢弛其遼東宣

府大同延綏陝西寧夏甘肅尤爲要害今特命總督軍

務威武大將軍總兵官朱壽上別名也統率六軍隨布人馬

或攻或守卽寫各地方制敕與之使其必掃餘孽靖安

民物至於河南山東山西南北直隸倘有小寇亦各給

與敕書使率各路人馬翦削羣臣泣諫不納丙午由東

安門出羣臣知而送者五十二人丁未度居庸歷懷來

等堡遂駐蹕宣府初彬導上治行宮於宣府糜費不可

勝計越歲乃成復輦豹房所貯諸珍玩及巡遊所收婦女實其中上甚樂焉每稱曰家裏還京後數數念之不置彬亦欲專寵俾諸幸臣不得近數導上遠出及再度居庸仍戒守者毋令京朝人來往蓋上厭大內初以豹房爲家至是更以宣府爲家矣八月乙酉上至大同先是鎮守太監馬錫以總兵葉椿第爲獻遂爲總督府居焉又奪都指揮關山指揮楊俊宅置店店所改爲酒肆榜曰官食車駕所至諸佞幸多先掠良家子女以充幸御至數十車在道日有死者十月戊辰渡黃河十一月

至綏德州幸總兵官戴欽第納欽女旋幸山西十二月
戊子駐蹕太原先是幸偏頭關取太原晉府樂工楊騰
妻劉良女嬖之及是復召見大得幸十四年正月戊辰
發太原壬申至宣府往返數千里皆輕騎戎裝冒風雪
以行有司供輦却弗御二月壬午還京文武百官具綵
帳數十綵聯數千不敢稱尊號惟稱威武大將軍亦不
敢稱臣大學士廷和奉觴儲執壺注酒冕奉果紀奉金
花迎於德勝門外無何上復手敕禮部總督軍務威武
大將軍太師鎮國公朱壽今往南北兩直山東泰安州

等處尊奉聖像祈福安民羣臣具疏懇諫不納遂發京師六月丙子宸濠反殺都御史孫燧副使許達庚辰南贛都御史王守仁吉安知府伍文定起兵討之甲辰反書聞廷臣議命將征之得旨令總督軍務威武大將軍總兵官後軍都督府太師鎮國公朱壽親統各鎮邊兵征勦鎮守撫按等官悉聽節制丁巳王守仁獲宸濠於樵舍并獲其世子郡王將軍并僞國師軍師元帥參贊尚書等官屬李士實劉養正數百人丁亥上在涿州留太監張忠私第九月壬辰朔駐蹕保定府張宴後堂戊

戊至臨清山東鎮巡官皆從進宴草略上視之笑曰慢
我何甚亦竟不怒及宴都御史王瑚獻觴步緩上目之
神周因休瑚謂上意不測明日復宴都御史龔宏趨進
自言姓名恐上誤以爲瑚也江彬從旁叱之莫并罪兩
人上不爲動太監黎鑑家人有以科斂得罪者鑑令官
所有以獻復取償於有司瑚不可鑑以頭觸之遂相忿
爭鑑泣訴於上上曰必汝有求不遂耳巡撫何敢辱汝
也鑑語塞而退初上之南征也與劉氏有約劉贈以一
簪且以爲信過盧溝馳馬失之大索數日不得及至臨

清使使召劉劉以無信辭上乃乘單舸晨夜疾歸至張
家灣與劉俱載而南道遇湖廣參議林文續入其舟奪
其妾乃行十月壬午發臨清丙申至徐州御龍舟乙巳
至清江浦幸太監張陽第集漁人捕魚爲樂時朱彬尤
橫縱旗牌官拷縛郡縣長吏通判胡琮懼而自縊南京
守備成國公朱輔見卽長跪總兵鎮遠侯顧仕隆稍不
爲屈卽窘辱之又遣官校四出矯旨索民家鷹犬珍寶
古器無得免者甲寅上至淮安却侍衛步入城幸顧仕
隆第己未至寶應縣漁范光湖十二月辛酉至揚州太

監吳經前選民居壯麗者爲總督府矯旨刷處女募婦
因取其金無金者悉送入府命神周搜括泰州廳大戊
寅大閱諸妓女於揚州撫按官具宴却之命折價以進
癸未漁於儀真之新聞明日幸民黃昌家閱太監張雄
守備馬昊所選妓以其半送舟中遂渡江丙戌至南京
丁酉迎春於南京備諸雜戲如宣府六月幸牛首山宿
焉諸軍夜驚左右皆不知上所在大擾久之乃定閏八
月癸巳受江西俘丁酉發龍江壬寅漁於江口遂如瓜
洲避雨民家夕宿望江樓次日濟江登金山遂如鎮江

幸致仕大學士楊一清第明日復幸又明日飲於其第
樂作分題製詩十章賜一清命和進爲易數字一清有
所獻上大悅及駕還凡五幸焉又幸故大學士靳貴第
時櫛在堂上臨撫嗟悼命所從番僧爲誦經薦福庚戌
發鎮江復宿望江樓癸丑至揚州仍寓總督府壬午發
揚州庚申至寶應復漁於范光湖鎮守太監邱得索貢
物於太守蔣琰不得以鐵索繫之辛卯駐蹕淮安都御
史叢蘭總兵官顧仕隆等進賀功金鑲花紅綵帳上戎
服簪花鼓吹入城宿故尚書金濂第丙寅至清江浦復

幸太監張陽第踰三日上自汎小舟漁於積水池舟覆溺焉左右拔之出自是遂不豫十日庚寅至天津庚戌至通州十二月己丑提督贊畫機密軍務兼提督官校辦事後軍都督府平虜伯彬奏奉總督軍務威武大將軍總兵官掌後軍都督府太師鎮國公壽指示方略擒宸濠逆黨乞明正其罪奉旨褒諭賞賚是日賜宸濠死甲午上還京文武百官迎於正陽橋南是日大耀軍容俾諸從逆者及家屬數千人陳輦道東西上戎服乘馬立正陽門外閱視良久乃入以親征凱旋遣官告祭天

地宗廟社稷

田經歷

田經歷名濬尤溪人正德間以掾受衛經歷性剛毅武廟南巡逆彬檄諸衛進遼金二史無以應擬釀軍士食糧以賄彬濡獨不從卽上記言書籍宜問諸學宮衛所不過軍器若文冊而已無從取辦彬大怒將逮訊太監張永呵曰安用此板在國子監乃索諸海濱卯衆大譁笑聲徹御幄武皇訊得其故亦笑曰江平虜此箭射不著當罰水二碗諸內侍爭以水灌之江淋漓免冠踉蹌出

自此喪氣

王知事

王知事名築寧夏人吏員爲保定知事武皇南巡過保定

伍巡撫名符視誠符素洪於飲上呼與拈鬪賭大觥不勝

悵連罰符數觥潦倒御門階前上大笑築直前奏曰符

老不任罰臣築請代上而而問曰汝小官能勝幾許對

曰不敵天子遠過撫臣上拍手笑手大觥賜者三執壺

者將復注上曰此不要採他這蠻子會賺我酒吃著扶

巡撫去符出謝曰今日微君幾殆後欲薦之辭曰是薦

酒也觀聽不雅人且議我

姚布政

鎮爲山東布政武皇南巡朝見偉其狀獨中官不喜御
駕黑龍舟被觸上驚問爲誰中官曰姚布政上笑曰是
美髯者耶釋不問是日鎮駐驛中是不知次日有以告
者始入謝上曰偶觸何傷去去

婁妃

寧庶人妃婁氏上饒人素賢庶人有禽獸行其父康王
屢欲殺之以婁能內助冀其改悔旣嗣益驕蹇淫虐縱

伶人入內庭與諸姬亂獨避畏婁不敢犯以非禮及殺孫名
許婁泣諫庶人怒曰妃居深宮何自知之密捕

送

婁名

時在旁內侍十餘人皆斬之斂送其首於婁發之大驚自後不復敢言及兵敗濠泣訣婁曰不用吾言以至

於此尚何道遂投水死庶人旣就執見王陽明名守仁以

葬婁爲囑居園圃中每飯必別具饌祀之言及輒歎曰

竊以聽婦言而亡孤以不聽婦言而亡冥冥之中負此

賢妃宸濠自世子外不請名蓋有異志他日欲自賜名

也故宮中止以行敘曰某哥某哥旣敗其第三子尚幼

投于水得浮木攀之爲漁家所收尋流落民間名曰朱學嘉靖十五年自言於霍邱縣送至京發入高牆

李劉相配

宸濠之反以李士實爲太師配李韓八也以劉養正爲軍師配劉青田也

錢寧

寧幼名福寧兒雲南李巡檢之家生子也太監錢能鎮守雲南時養以爲子冒錢姓爲人猥狡柔佞善伺察迎合能時結納逆瑾寧因得見毅皇帝大被寵幸賜國姓

冒功爲錦衣千戶瑾逆謀露寧以計免等陞都督掌衛事典詔獄恣肆無忌請於禁內建豹房日誘上畋遊娛樂招權納賄僞旨傳陞各邊將官所得金珠以數百萬計時宸濠久蓄異志寧得濠重賄因與圖復護衛屯田且日伺朝廷動靜泄之濠謀令世子赴闕爲立儲地寧爲畫計及濠反乃捕寧下獄雜治獄未具會毅皇崩世廟卽位刑部會鞫以聞命磔於市藉沒家產金七十一扛共十萬五千兩銀二千四百九十扛共四百九十八萬兩碎金銀并首飾五百二十箱珍珠二櫃金銀酒器

四百二十副胡椒三千五百擔蘇木七十扛段疋三千六百扛餘祖母祿佛一座重數斤匿題奏本四十餘件什物莊房不計其數

郵老曰胡侍墅談曰祖母祿卽元人所謂助木刺也出回回地面其色深綠其價極貴而大者猶罕得聞成化間官裏以銀數千兩買得重四五兩者一塊以爲希世之寶錢寧私藏乃有祖母祿佛重至數斤又藉廖鵬得貂皮衲六十件皆內帑所無異哉寧每投刺於人自稱皇帝子

江彬

彬萬全都司蔚州衛指揮使也性驟悍然寔無他材略正德壬申以大同游擊隨總兵官入討畿內盜賊事寧乃要結錢寧入豹房時毅皇好武彬因時時談兵事高自稱許遂有寵賜國姓與毅皇同臥起或時搏虎爲樂又取遼陽宣大延綏四鎮兵入內教場操練都人號爲外四家彬復自立西官廳自爲提督益樹黨援引邊將神周李琮等同入豹房朋奸蠱誘導篤駐宣府興建宮殿號爲家裏封彬平虜伯自是乘輿屢出經大同抵榆

林且駿，饗讓南遷，每出毅皇自稱威武大將軍。彬卽稱威武副將軍，及宸濠反，彬因請親征。彬扈行以勁卒自衛，駕離都城南一日，江西以捷聞。彬勸上縱濠入鄱湖，俟駕至再擒奏捷。比至南京，復欲導幸蘇浙湖湘。廷臣所上章疏一切匿不聞。及毅皇寢疾，豹房、彬猶改團營爲威武團練營，自提督兵馬中外惶懼，謂彬必反。會毅皇崩，慈壽皇太后亟命執彬下獄。法司鞠問，反形已具，請亟誅。肅皇帝命磔於市。其黨神周李琮子勲、杰、黎熙及家屬江和許宣等皆斬藉其家，金七十櫃共二十萬五。

千兩銀二千二百櫃共四百四十萬兩金銀首飾五百
二十箱金銀湯盃四百餘錦繡珠玉珍寶莊房不可勝
計阻抑邊情本一百三十六件

劉瑾

瑾陝西興平人本姓談幼自宮投中官劉姓者得進因
冒其姓警憚陰狡有口辨殺皇節位與青宮舊闈馬永
成谷大用等號爲八黨亦曰八虎日導大馬鷹兔舞唱
角觝漸棄故舊罔親萬幾外廷攻之甚急上意頗動瑾
伏地泣訴曰狗馬膺免何損萬幾左班官敢無忌者司

禮監無人也有則唯上所欲耳於是立命瑾掌司禮監時上希親政且厭苦言者瑾每攜雜藝上前俟其玩弄乃多取各司章奏請省決上每曰吾用爾何爲乃一一煩朕耶亟持去日是數次後瑾不復奏事無大小瑾輒持回私第與孫聰張文冕輩僞換旨付外施行多或累數百言任其恣睢往往有不可解者諸司事無巨細必先以紅揭帖取進止謂之紅本其下通政司者謂之白本由是大權一歸於瑾天下不復知有朝廷矣又日求官僚細過深文以督責之小有觸犯輒中以危禍散遷

官校遠近偵察使人皆自救不給莫敢進言變易選法
任情黜陟賄薄隨卽革罷加賄又輒用之或徑自傳奉
或別本帶批受宸濠賄復其護衛以成其亂勲戚以下
因事私謁者率叩頭爲一拜禮瑾踞受之麾叱如僕隸
惶怖不敢仰視屢起大獄枷三品以下官民間稍有違
禁卽舉家收捕置之重典且立連坐法一家有犯左右
鄰悉坐有傍河而居無鄰右者以河外居民坐之故官
校一出所過皆賂之重足屏息惟恐得禍又信術士俞
曰明等言以姪孫二漢當大貴遂有不軌之謀私造僞

璽以利刃藏扇靶中時挾入宮蓄謀不測至是爲張永所發法司鞫問反形已具乃命殉於市凌遲三日行刑之日仇家爭以銀一錢易一轡肉生噉之海內聞之踴躍相賀藉其家得平天冠一頂袞龍袍四件蟒衣四百七十襲八爪金龍盔甲三十副金甲一副金鈎三千金絲碧玉帶五條白玉帶四千一百六十條玉印一顆玉琴一張寶石二斗牙牌二櫃穿宮牌五百面金銀湯盃五百件金二十四萬錠碎金五萬七千八百兩銀元寶五百萬錠約計銀二十五萬零銀一百五十八萬

三千六百兩匿諸司奏本 件餘物不可勝計瑾初

專政欲盡除軋已者一日伺間言於上調張永於南京
自未下卽日逐永出就道榜諸禁門不許放永入永覺
之直趨至御前訴己無罪爲瑾所害召瑾至語不合永
卽奮拳毆之谷大用等解之令諸近臣皆置酒和解及
永平寧夏還與楊一清定謀誅瑾永獻俘畢與素所厚
宦侍張雄張忠等乘間共訴於上言瑾不法十七事反
形已具宜早擒之上猶豫間永等曰少遲奴輩皆齧粉
矣陛下獨安所之乎上始命禁兵逮瑾永等勸上親至

瑾第觀變時漏下三鼓瑾方寢熟禁兵排闥入瑾驚起
曰事可疑矣趨出戶遂被執繫於菜廠猶未有意誅之
也明日科道列上瑾罪始命會多官鞫訊於午門外刑
部尚書何鑑或曰劉瑾畏瑾噤不能出一語諸公卿旁列亦
稍稍退却獨駙馬蔡震折斥之瑾曰汝何人忘我德震
厲聲曰震國戚何賴于汝呼官校前拷掠之是日微震
幾不能成獄

韓苑洛雜識云正德三年六月早朝拜伏既起御堵上
有無名揭帖一本皆言劉瑾事上命錦衣衛查既而劉

瑾傳旨令百官奉天門下跪候發落辰刻命堂上官起
出已刻瑾立門東翰林院官面東跪訴內監侍翰林官
素厚豈肯如此瑾令起出御史甯果訴曰御史等官素
知法度豈敢如此此乃新進士所爲瑾曰新進士與他
有何相干爾每把朝廷事件件都壞了略加處置就都
怨恨太祖法度爾每不會見豈不聞知瑾令百官皆起
照舊站立看有揭帖處是何官太監黃偉曰凡朝四品
以上各照班次以下皆雜立丟帖之人豈肯復立於此
處虧了人瑾令復跪又點武士令各官家搜稿黃又曰

他幹此事雖妻子亦不得知豈肯留稿時天暑日烈通
無片雲微風僵者數人命拽出黃公忿曰你帖子說的
都爲國爲民事挺身出來死了也是好男子枉累別人
瑾怒曰在外匿名帖子尚該死罪御前如此是何爲國
爲民好男子如何不明白具奏言畢竟入留太監李榮
監之李曰你每倒一倒衆內使擲下冰瓜甚多李曰你
們取食之少頃瑾出李曰你們知跪着來了來了瑾見
甚怒復入旣而傳出李榮私宅閒住黃僊南京閒住申
刻旨出都拿送錦衣衛追究進士陸仰昏迷擡至錦衣

衛監中不能容丟放院內是夜不知何時身故都人徇
徇皆罷市初各官拿送錦衣時途中賣飯者皆爭以飯
遞送各官不索價明日瑾微聞帖子乃內人所爲命軍
官丟下乃命名堂上官將各官領出辦事劉景祥者
瑾兄也爲後軍都督府同知先瑾未敗卒賜祭葬加等
公卿弔賻恐後車馬填塞東華私第至不能容將葬又
往設祭重罰錢帛謂之辭靈瑾敗之夕密旨封瑾門戶
出景祥柩棄於道傍旣而追削其官焚其屍聞者快之
初京師里巷私語籍籍謂八月十五日傾朝送葬瑾已

密與一二同惡定計欲爲變是時夜禁甚嚴犯者至死
星出後寂然無鶴犬聲有中夜竊聽者聞甲兵鏗然相
繼邏卒飛騎交絡於道黃紙黑索喧囂如沸咸謂肘腋
不測之變而不知瑾固已被擒矣蓋先景祥葬期兩日
云

張文冕

張文冕華亭人初爲縣學生被黜潛至京師投劉瑾門
下遂用事冒軍功授錦衣衛千戶瑾傳旨意多出其手
交通賄賂氣焰傾一時至是瑾敗并誅妻妾送浣衣局

花當閣叢談

卷一

花當閣叢談卷一

四